

חבקוק

3

2

1

הפרק 1

המשא אשר חזה חבקוק הנביא

²עד אנה יהוה שועתי ולא תשמע אזעק אליך חמס ולא תושיע

³למה תראני און ועמל תביט ושד וחמס לנגדי ויהי ריב ומדון ישא

⁴על כן תפוג תורה ולא יצא לנצח משפט כי רשע מכתיר את הצדיק על כן יצא משפט מעקל

⁵ראו בגוים והביטו והתמהו תמהו כי פעל פעל בימיכם לא תאמינו כי יספר

⁶כי הנני מקים את הכשדים הגוי המר והנמהר ההולך למרחבי ארץ לרשת משכנות לא לו

⁷אים ונורא הוא ממנו משפטו ושאתו יצא

⁸וקלו מנמרים סוסיו וחדו מזאבי ערב ופשו פרשיו ופרשיו מרחוק יבאו יעפו כנשר חש לאכול

⁹כלה לחמס יבוא מגמת פניהם קדימה ויאסף כחול שבי

¹⁰והוא במלכים יתקלס ורזנים משחק לו הוא לכל מבצר ישחק ויצבר עפר וילכדה

¹¹אז חלף רוח ויעבר ואשם זו כחו לאלהו

¹²הלוא אתה מקדם יהוה אלהי קדשי לא נמות יהוה למשפט שמתו וצור להוכיח יסדתו

¹³טהור עינים מראות רע והביט אל עמל לא תוכל למה תביט בוגדים תחריש בבלע רשע צדיק

ממנו

¹⁴ותעשה אדם כדגי הים כרמש לא משל בו

¹⁵כלה בחכה העלה יגרהו בחרמו ויאספהו במכמרתו על כן ישמח ויגיל

¹⁶על כן יזבח לחרמו ויקטר למכמרתו כי בהמה שמן חלקו ומאכלו בראה

¹⁷העל כן יריק חרמו ותמיד להרג גוים לא יחמול

הפרק 2

על משמרתی אעמדה ואתיצבה על מצור ואצפה לראות מה ידבר בי ומה אשיב על תוכחתי

²ויענני יהוה ויאמר כתוב חזון ובאר על הלחות למען ירוץ קורא בו

³כי עוד חזון למועד ויפח לקץ ולא יכזב אם יתמהמה חכה לו כי בא יבא לא יאחר

⁴הנה עפלה לא ישרה נפשו בו וצדיק באמונתו יחיה

⁵ואף כי היין בוגד גבר יהיר ולא ינוה אשר הרחיב כשאל נפשו והוא כמות ולא ישבע ויאסף אליו כל

הגוים ויקבץ אליו כל העמים

⁶הלוא אלה כלם עליו משל ישאו ומליצה חידות לו ויאמר הוי המרבה לא לו עד מתי ומכביד עליו

עבטי

⁷הלוא פתע יקומו נשכיך ויקצו מזעזעך והיית למשסות למו

⁸כי אתה שלות גוים רבים ישלוך כל יתר עמים מדמי אדם וחמס ארץ קריה וכל יושבי בה

⁹הוי בצע בצע רע לביתו לשום במרום קנו להנצל מכף רע
¹⁰יעצת בשת לביתך קצות עמים רבים וחוטא נפשך
¹¹כי אבן מקיר תזעק וכפיס מעץ יעננה
¹²הוי בנה עיר בדמים וכוון קריה בעולח
¹³הלוא הנה מאת יהוה צבאות וייגעו עמים בדי אש ולאמים בדי ריק יעפו
¹⁴כי תמלא הארץ לדעת את כבוד יהוה כמים יכסו על ים
¹⁵הוי משקה רעהו מספח חמתך ואף שכר למען הביט על מעוריהם
¹⁶שבעת קלון מכבוד שתה גם אתה והערל תסוב עליך כוס ימין יהוה וקיקלון על כבודך
¹⁷כי חמס לבנון יכסך ושד בהמות יחיתן מדמי אדם וחמס ארץ קריה וכל ישבי בה
¹⁸מה הועיל פסל כי פסלו יצרו מסכה ומורה שקר כי בטח יצר יצרו עליו לעשות אלילים אלמים
¹⁹הוי אמר לעץ הקיצה עורי לאבן דומם הוא יורה הנה הוא תפוש זהב וכסף וכל רוח אין בקרבו
²⁰ויהוה בהיכל קדשו הס מפניו כל הארץ

הפרק 3

תפלה לחבקוק הנביא על שגינות
²יהוה שמעתי שמעך יראתי יהוה פעלך בקרב שנים חייהו בקרב שנים תודיע ברגז רחם תזכור
³אלוה מתימן יבוא וקדוש מהר פארן סלה כסה שמים הודו ותהלתו מלאה הארץ
⁴ונגה כאור תהיה קרנים מידו לו ושם חביון עזה
⁵לפניו ילך דבר ויצא רשף לרגליו
⁶עמד וימדד ארץ ראה ויתר גוים ויתפצצו הררי עד שחו גבעות עולם הליכות עולם לו
⁷תחת און ראיתי אהלי כושן ירגזון יריעות ארץ מדין
⁸הבנהרים חרה יהוה אם בנהרים אפך אם בים עברתך כי תרכב על סוסיך מרכבתיך ישועה
⁹עריה תעור קשתך שבעות מטות אמר סלה נהרות תבקע ארץ
¹⁰ראוך יחילו הרים זרם מים עבר נתן תהום קולו רום ידיהו נשא
¹¹שמש ירח עמד זבלה לאור חציך יהלכו לנגה ברק חניתך
¹²בזעם תצעד ארץ באף תדוש גוים
¹³יצאת לישע עמך לישע את משיחך מחצת ראש מבית רשע ערות יסוד עד צואר סלה
¹⁴נקבת במטיו ראש פרזו יסערו להפיצני עליצתם כמו לאכל עני במסתה
¹⁵דרכת בים סוסיך חמר מים רבים
¹⁶שמעתי ותרגז בטני לקול צללו שפתי יבוא רקב בעצמי ותחתני ארגז אשר אנוח ליום צרה לעלות לעם יגודנו
¹⁷כי תאנה לא תפרח ואין יבול בגפנים כחש מעשה זית ושדמות לא עשה אכל גזר ממכלה צאן ואין בקר ברפתים
¹⁸ואני ביהוה אעלוזה אגילה באלהי ישעי
¹⁹יהוה אדני חילי וישם רגלי כאילות ועל במותי ידרכני למנצח בנגינות: